

Oder dadurch das gwilddt fangen/
 Vnd mitt dem raub also brangen/
 Daruon sie worden seindt gar reich
 Gwilddt ztöden ist jhn niemandt gleich:
 Dan man hatt züvor das jagen
 Eb man hatt die netz vmb dhagen/
 Spant/ vnd mitt den hunden hegen/
 Welche das gwilddt oft thünt legen/
 Mitt feur vnd grüben angfangen/
 Das gwilddt fahen mitt verlangen/
 Es seye nuhn diß was es wöll/
 Für ein vrsach/ das die weldt soll/
 Die hitz mitt knaschlen ganz verbert/
 Vnd wurzlen in den grundt verzert/
 Der beumen / gsteuden/ vnd des gras/
 Darauß man hatt ersähen das/
 Wie auß der erden klüfften blitz
 Das arz nach dem das feur erhitzte
 Ein Bach ist gflossen also frey/
 Von goldt/ sylber/ kupffer vnd plei/
 In die hole teil der erden
 Darauß mitt gfar ghauwen werden.

Aber d Poet achtet/ es seye durch solche brüst nicht allein die gāng entblöst/
 sond auch dz ganz werck d metallē habe dardurch sein anfang gnomē. Zülest
 so entblöst auch die gāng ein ande krafft: dan ein pferdt/ so d red zü trauwē ist/
 hatt mitt der hüß zü Goslar das plei entblöst. Derhalben mit diserley weisen
 gibt vns dz glüct die gāng: aber durch kunst ersüchen wir heimliche vñ verbor-
 gne gāng/ so wir erstmalen auff die quäll der brunnen achtung haben / die von
 den gāngē nicht weit sein können/ dieweil auß jnen jr wasser herauß fleusset/ als
 dan dz geschüb/ welche auß d erdē/ ein strēgs wasser gerissen hatt/ die lege d zeit
 aber derē ein teil widerum bedeckt / aber solche geschüb dieweil sie auff d erden li-
 gendt/ od sonst glatt seindt/ so treg es sich gewölich zü/ dz die gāng von jnē fehr-
 ner seyendt/ daruñ dz sie ein strengs wasser weit vō dē gāngē herauß gerissen/
 hinweg gfürt/ vñ jm auß treibē glatt gmacher hatt. So sie aber in der erden ste-
 ckendt/ od rauch seindt/ so seindt die gāng auch nach darbei. Weiter ist auch die
 gelegenheit zü betrachten/ dan die selbige gibt oft vrsach / dz die gāng mehr od
 mind mitt erdē überschütt/ vñ die gschübe in die weite od nähe hinauß getriben
 werdē. Die gāng aber mitt diser weise gefundē/ heissent die bergkleut geschübe.
 Zü dē so wir die gāng süchen/ habendt wir fleißig achtung auff die reiffen/ von
 welchen alle kreuter weiß sähē/ außgenomē dise die auff den gāngen wachsen/
 dan es ghet vō jnē ein hiziger vñ drockner düst/ welcher dieweil sie feucht seindt/
 dz züsamē gfrürē verhindt. Derhalbē seindt solche kreuter mehr vō wasser naß/
 dan von dēreiff weiß/ welchs man an allen kalten ortē sähē mag/ eb die kreuter
 recht groß werden/ wie im Aprillē vñ Meyē/ oder so dz letst heuw/ welchs man
 Embd nennet/ abgemäiet wirt/ als im herbstmonat. Derhalben an welchē ort
 die feuchte kreuter durch den reiffen nicht züsamen fallen/ da ligt vnder jnē ein
 gang/ welcher so er ein hizigen dunst von sich gibet/ so tregt die selbige erd klei-
 ne vnd kurze trentlin / die nicht einer läblichen farb seindt. Zülest welcher beu-
 men bletter im Lentzen ein wenig blauw oder pleifarb seindt/ vñ vorauß die o-
 berē äst mit schwerze/ od einer anderē vnnatürlichē farb gferbet / die gswiselte
 stānholtz seindt d gleichē/ vñ auch die äst schwarz vñ mächerlei farbē/ welche die
 hizige vñ dörre dunst also machēdt/ die auch dē wurzlē d beumē nicht schonēdt/
 sond machēts mitt jrē beumē gāz schwach. Vō dessen wegē die macht d windē/
 solche beu mehr dan ande auß dē grüdt reiffet/ die gāng aber gebē vō sich dünst.
 derhalben